

*Un'altra favola*

**U PURPU E LAUSTA**

Un purpu “tampalesi”,  
firriannu tra li scogghi,  
‘un vitti na lausta  
ammucciata tra i fogghi  
di “lattuca di mari”,  
bedda spaparacchiata,  
chi ci truncau na ranfa  
tuttu di na vulata.

U purpu pi salvarisi  
tuttu u niuru iccau,  
facennu ‘ranni negghia,  
nna tana s’ammucciau.  
Ma appena chi ‘nchiariu,  
‘ntunnu ‘ntunnu taliannu,  
a lausta appustata  
vulia aumentari u dannu.

E u purpu allura dici:  
“un t’abbastau na ranfa,  
vattinni arrassu, ..gira  
chi ti inchisti a panza.  
Tu passasti u piaciri  
di manciarimi un peri”.  
“Pi sta vota ti lassu,  
‘unn’aviri pinzeri.

Ma siccomu mi scordu  
soccu manciai aeri  
si mi veni arrè a tiru  
ti scippu n’autru peri.

## I ATTI

Menu mali chi i atti  
'un rapinu i casciana  
e mancu i frigoriferi  
ma stannu gnuna, gnuna.

Rorminu tuttu u iornu  
mancianu e si nni vannu.  
I mei su' ammaestrati  
e 'un fannu tantu dannu.

È certu chi capiscinu  
tuttu soccu ci rici,  
ti fannu cumpagnia,  
megghiu di tanti amici.

Ma si tu fai na cosa,  
in casa o nno iardinu,  
eccu chi arriva a atta  
e s'aggiucca vicinu,

ti firria 'nmezzu i ammi,  
ti continua a taliari,  
comu si 'ntesta d'idda  
ti vulissi aiutari.

Una è niura  
e nautra è ammiscata  
e l'attruvammu  
chi chiancia 'nmezzu a strata.

*Febbraio 2001*

**“Cicero pro domo sua”**  
**“CICIRU” pa so casa**

Ma cu fu stu ‘ranni “Ciciru”  
di l’ebbica Romana?

- prantala ‘unni purtava,  
stava sempri ‘n suddana -  
Dicinu li libbrazza  
chi fu un ‘ran chiacchiaruni,  
parlava e muvia i vrazza  
davanti lu balconi.

Fu un ‘ranni avvocatatu  
chi parlava o Sinatu;  
priseniti ogni matina,  
pari l’avissi sempri  
cu me ziu “Catilina”(\*).

Ma chi penzu a sti cosi  
di seculi passati?

Megghiu lassari stari,  
su cosi accutturati!

Li libbra su nn’agnuni  
e ora resta sulu  
un ‘ranni chiacchiaruni.

E parlannu, parlannu,  
faccia a vuciuzza lasa;  
dicinu chi pinzava  
sulu pi la so casa.

Però sta conclusioni,  
certu, chi n’un l’onora  
e assimigghiava tannu  
e deputati d’ora.

(\*) *Lucio Sergio Catilina, grande oppositore di Cicerone*

## U CALAMARU

Un vecchiu calamaru arrugginutu  
cu 'nchiostru tuttu siccu arripuddutu,  
taliannu u porta pinni supra u scagnu,  
si metti a arraggiunari magnu, magnu:

“Quannu eru ‘n serviziu,  
pi piaciri o pi sfizio,  
a viviri mi ravanu  
comu s’avissi u viziu.

A pinna m’ammugghiavanu  
e ogni cosa scrivìa,  
lassannu supra a carta  
tutta l’anima mia.

Paroli, ...’ran pinzeri  
u ‘nchiostru addivintava,  
puru numari e cunti  
si a sordi arraggiunava.

Ora sti tubbiceddi  
di forma tantu strana  
scriviri ponnu a longu,  
puru pi na simana!

Ci sunnu pinnarelli  
chi fannu pittura e ‘grafica’:  
ma chidda chi mi futtu  
fu a pinna stilografica”.

*Novembre 2000*

## I CACCIATURA

A Napula ci sunnu cacciatura.  
Parlanu sulu di caccia e di scupetti,  
di cani, di cunigghia e di furetti.  
A matina susuti di bon'ura,  
trasinu a lu cafè prima di setti  
tutti cunzati, cu stivala e "ghetti",  
giubbotti cu sacchetti a mai finiri,  
cuteddi, cutidduzza e finimenti  
e nna mmiscagghia unu stuzzicarenti.  
Giranu pi vuscagghia o pi vadduna,  
'nmezzu li scogghi, li zucchi e li pruna.  
Si a caccia è scarsa e 'un s'arrusti nenti  
a soccu servi lu stuzzicarenti?

Alla finuta tornanu o cafè!  
"viremu, chi pigghiasti, soccu c'è?"  
Su tutti 'nzaccarati, chini di "punci, punci"  
ma nna sacchina hannu sulu funci.

## IMPROVVISU

Cu c'è megghiu da atta?  
Sempri prontu è u manciari.  
E carni e cruccantini  
mai l'avi ad addisiari.

Si lava e si stinnigghia nno piuminu  
e i so bisogni i fa dintra u iardinu,  
spissu è tantu tinta  
chi scappa strata strata,

ma appena s'arricampa  
abbusca na pirata!  
S'agguatta, si quartia  
e torna nno piuminu.

P'idda ogni ura è bona  
pi fari un "pisolinu".

## € VVIVA! ACCATTAI L'EURO

Stamatina alla Posta  
(chi quasi, c'ivi apposta)  
e stu "quasi" è pirchè  
ci fu puru occasioni  
di mettimi 'nsacchetta  
la pensioni.

Pigghiai quattru sacchetti  
di muniti "brillanti",  
cchiù "brillanti" di i liri  
sulu pi centumilaliri.  
Su quattru pugniceddi  
ma un parinu poi tanti.

Appena i misi 'nmanu  
mi vinni u trimulizzu  
pizannu i beddi liri  
chi mi mittia a capizzu.  
Ci su puru i centesimi,  
cu i primi di innaru  
diventanu in Europa  
u novu gran dinaru.  
Calcoli e calculiddi  
quantu nn'avemu a fari.  
Pari un pocu difficili  
ma s'avi a cuminciari;  
prezzi e muniti novi  
è chissa sta 'ran lizza,  
pi farini li cunti  
a testa ci s'appizza.

Ma un si pò fari autru,  
nn'avemu a abituari,  
c'un pocu di pacenza  
nni sapremu adattari.

## A FLORY, VIVI, CICCI E LALLA

Haiu quattru niputeddi malafini  
prima eranu nichì e ora signurini.

Si un pocu amaru è  
chi sunnu fimmineddi,  
na cosa mi consola  
su veramenti beddi!

I mittia spada a spada:  
eccu quattru scaluna.

Puru si c'era u sulì,  
puru si c'era a luna,  
e ora chi crisceru  
e addivintaru "donne"  
mettili spada a spada  
chi su quattru colonne.

Si sunnu sturiuseddi?  
Davveru 'un c'è chi diri  
una quasi è arrinisciuta,  
ormai iunta a finiri.

L'autri ci vannu appressu,  
sempri avanti si vâ:  
una ancora è o liceu,  
l'autri all'università  
ma puru si sturianu  
canuscinu i furneddi  
sunnù puru di casa,  
su veramenti beddi!



## MOSE

Ma chi rispettu c'è  
si o attareddu meu  
iò ci misi "Mosè",  
anchi si 'unn'è rispettu  
e pirchi u truvammu  
iccatu nno cassonettu.  
Chiancia, straziava u cori,  
pi cu l'avi.  
Fu pigghiatu e allevatu;  
era sulu testa e ammi  
pisava sulu ducentusettantagrammi,  
fu allattatu cu amuri  
e tantu affettu  
ora è cchiù d'un chilu nettu  
Ora chi staiu scrivennu,  
m'acchiana sinu 'npettu,  
mi firria e s'assetta supra u coddu,  
scinni e s'assetta supra stu fogliettu.

*Dicembre 2001*

## **DINGHI, DINGHI**

### *A notti di Natali*

DINGHI, DINGHI la campanedda!  
passa pi strati fatti a vuredda,  
chiama a genti di li casi  
chi pi lu friddu 'un nescinu i nasi.

DINGHI, DINGHI la campanedda!  
chiama i ricchi e li puviredda  
sta notti a missa s'avi ascutari,  
chi è Natali e avemu a priari.

DINGHI, DINGHI la campanedda!  
nesci un pasturi di na vanedda.  
I picuriddi già sunnu "o chiusu"  
chi u friddu è forti e assai rausu.

DINGHI, DINGHI la campanedda!  
sona, sona la ciaramedda,  
di Natali a la missa si và,  
chi la campana sunau già!

*Febbraio 2002*

## STÀ MARIA

Stà Maria davanti a cruci  
sutta un'arvulu di nuci.  
Manta niura e 'nmanu un gigliu  
chianci a vita di so figghiu.  
Ma so figghiu già spirau  
e la testa reclinau,  
detti l'anima a so Patri  
e lassau la bedda mati.  
Maddalena cu Giovanni  
cunsularu li so affanni  
e la 'ranni sua afflizioni  
'un sapennu da resurrezioni.

*Gennaio 2002*

*Geografica*

## **QUINOZII E SULSTIZII**

E lu quinoziu v'à spiegari stiornu  
di quannu a notti è paraggia o iornu.  
Chi unu veni sempri a primavera,  
l'altu in autunnu, quannu c'è bufera.

Ma puru si su i stessi li iurnati  
u lustru è assai cchiù longu na l'estati.  
E quannu è invernù, e u rici u calendariu,  
i cosi invece vannu all'incontrariu.

Ma sturiannu, sturiannu cu 'ran sfiziu  
sti iurnati su ditti solstiziu.  
Pirchè lu iornu è longu, longu assai  
e la notti è cchiù curta chi mai.

Sta cosa a sannu tutti strati, strati  
e si chiama solstiziu d'estati  
ma stu giochettu continua in eterno  
pirchè c'è puru u solstiziu d'invernù:  
ca notti longa, longa a mai finiri  
e u iornu curtu, curtu, pi capiri  
sti cosi cumplicati unn'è uno spassu,  
chi già mi doli a testa, e ccà vi lassu.

## VESTI E SPOGGHIA

Beati Adamu ed Eva  
chi avianu na fogghia,  
e comu a mia 'un facianu  
vesti e spogghia!  
Beati su l'armali,  
chi c'un sulu vistitu  
ci fannu estati e 'nvernu,  
senza moviri 'un ditu.  
E niautri invece,  
puru senza vogghia,  
'unn'avemu soccu fari:  
si va avanti a "vesti e spogghia".  
Ch'è filici la fimmina  
quannu fa cancia e scancia,  
accussi si fa u lussu,  
puru si poi un si mancia.

Pi fari 'ran fiura  
chi sugnu un "galantomu"  
megghiu stiornu mi mettu  
arrè u vistitu bbonu.  
Sugnu tuttu 'mpupatu  
e prontu supra a "sogghia"  
e comu sempri fici  
"spoggia e vesti  
vesti e spogghia".  
Ma si poi tornu 'ncasa,  
chi a fiura fu fatta  
mentri mi spogghiu eccu  
'nmezzu i peri a me atta:  
e mi sfutti cu l'occhi,  
e l'ugnia si cummogghia,  
s'aggiucca e mi talia  
chi fazzu "vesti e spogghia".

nenti c'è d'invintari  
cu i nostri beddi testi  
pi 'un fari "vesti e spogghia"  
e mancu "spoggia e vesti"?

## E 'UN MI TRUZZARI A SEGGIA

Un picciriddu, un pocu dammaggiusu,  
firriava 'ntunnu a seggia di so nannu,  
chi runfuliava leggiu  
e a nuddu facia dannu.

Ma lu mariolu di megghiu 'unn'avia  
e ogni tantu u truzzava nna so via.

Ma u cristianu, pigghiannu cunuscenza,  
ci finiu di scappari la pacenza!

“Figghiu di bbona matri, chi è me figghia,  
ti nni vai, e chi u riavulu ti pigghia!”

Ma poi pintutu, penza a moru sò:  
“quann'era nicu u facia puru iò”.